



VERSCHNUUFFER GNEPF

Zeedel Verschnuuffer Gnepf 2025

Hauptsach Gfielssach

«Inside out» und alles stoht Kopf
Kurz vor dr Fasnacht bi jedem Gnopf
Im Kino wie im ächte Lääbe
Steehn d Gfiel statt in de Schueh drnääbe
Dr Morgestraich kunnt als wie nööcher
Dr Puls stigt hoch und als wie hööcher
Und wenn die drey Dääg duesch duurlääbe
Denn blybsch bi jedem Gfiel mol glääbe

Do isch zem Bispil puri Fraid
Wenn Basel in dä Zauber gheht
Wenn s erscht mol «Yystoh!» gruefe wird
Wenn d Hand dr Schlegel brächtigt fiehrt
Jä wenn das ganze Basler Flair
Uffsuuge kasch, was willsch no meer?

Aber s isch nid alles glatt
Au Angscht und Zwiifel finde statt
Hausch mol e Schlepp mit ganzer Graft
In d Achtelpause, denn hesch's gschafft
Ass Angscht und Zwiifel dir dien saage
Ass d Glygge di nym mag verdraage
Dr Eggel kunnt au männgmool fiire
Wenn Abfallbäärg d Stadt verschmiire

Und denn isch bim Gässle dr Wäg verstopft
Während s Keerzli em Vortraab uff d Finger dropft
In so Momänt bassiert's no glyy:
E gnärvti Langwiil schlicht sich yy
Si findet's nämlig nid zem Lache
Drey Dääg lang immer s Gliiche z mache
«Scho wider yystoh, scho wider Arabi?»
Nai danggschön, mini Liebe, zem nöggste Halt trab y»
Aber wenn me d Tradition will pfäage
Gheert das drzue – wirsch's iiberlääbe

Bim Cortège denn, ihr kennet's alli
Meint e Touri, dass ys das gfalli
Wenn är schnäll, schnäll, zwüsche Majoor
Und em Spiil, ganz ohni Gfoor
Im Stächschritt duurehusche duet
Et voilà – Biini frei fyr d Wuet
Und die Wuet blybt grad am Heebel
Will si heert baar komisch Veegel
Naime rieht e Ziircher: «Mami!
Ich bin volle Konfetti, gopfverdammli!»
Als wär's nid gnuog, sait e Schwob ze sim Kind:
«Mensch Lotte, wie hübsch diese Masken sind!»

Und wenn dr Donnschtigmoorge noot
Denn kunnt e Gfiel, wo jede verstoot
Die Fasnacht kunnt jetzt denn zem Schluss
E letschte Marsch, en Abschiedskuss
Es singe haiter d Piccolo
Als ob so d Zyt wurd blybe stoo
Es isch dr Uftrytt vo dr Druur
Loss si zue, Gnopf, sig nid stuur
Wenn die Druur duesch ganz lo syy
Denn wird si bald zer Noschtalgyy
Im Kopf und Häärz kasch so vyy bhalte
Erinnerige, wo Vorfraid gsalte
So schlyycht denn d Nostalgyy duur d Gasse
Mit Geschichte wo s Häärz fescht will fasse
S isch Ändstraich, d Fasnacht isch passé
Und mir hän alli Gfiel lo gschee
Ob Fraidedrääne oder phyynlig root,
Ob Zwiifel, ob Druur, wenn's Ändstraich schloot
Es spiilt kai Rolle, was grad no bassiert,
Hauptsach, d Gfiel hän die Fasnacht regiert.

S Lääbe keert in Alltag zrugg
Vom Gellert bis zer Wettstaibrugg
«Kai Angscht», sait d Fraid, «mr sehn ys gly!
Im April ufem Barfi mitem Shaqiri! »

D Ladäärne-Uusstellig uff em Minschterplatz und d Waage- und Reggwisyte-Uusstellig bi dr Kasäärne sin vom Määntig znacht bis am Mittwuch demoorge! Deert und an de Verkaufsständ (CINS) in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe.

Am Frytig, 14. Meerz und Samschtig, 15. Meerz 2025 findet uf em Barfi die 1. Lektion statt. Fasnacht für alli zum Kennelehre und Usprobiere! fanzt-fasnacht.ch

D Zeedellääsede isch am Sunntig noo dr Fasnacht 2025, am 16. Meerz, vom Finfi bis am Siibeni zoobe, in dr Baseldytschi Bihni (im Lohnhof 4). D Foyer-Bar isch vom Vieri ewägg offe.